

**Uunga siunnersuut: Tusagassiorfinnut tapiissuteqartarneq pillugu Inatsisartut
inatsisaata allanngortinnera pillugu Inatsisartut inatsisaat**
*Ilinniartitaanermut, Kultureqarnermut Timersornermut Ilageeqarnermullu Naalakkersuisumit
saqqummiunneqartoq*

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

siunnersuutip aappassaaneerpeqarneranut

ISUMALIUTISSIISUTAA

Ataatsimiititaliap suliarinninnermini inuttarai:

Inatsisartunut ilaasortaq Nivi Heilmann Efraimsen, Inuit Ataqtigiit, siulittaasoq
Inatsisartunut ilaasortaq Isak Johannessen, Naleraq, siulittaasup tullia
Inatsisartunut ilaasortaq Margrethe Thårup Andersen, Demokratiit
Inatsisartunut ilaasortaq Karen-Marie Kyed Frederiksen, Demokratiit
Inatsisartunut ilaasortaq Nivi Rosing, Inuit Ataqtigiit

UPA2026-mi ulloq 28. april 2026 siullermeerinerup kingorna ataatsimiititaliap siunnersuut
misissorpaa.

Siunnersuutip imarisaa siunertaalu

Tusagassiorfiit kiffaangissuseqarnissaat arlaannaannullu attuumassuteqannginnissaasa
qulakkeerneqarnissaa tamatumani tusagassiorfiit digitaliusut tusagassiorfinnut
tapiissuteqarnermi ilaatinneqarnissaat siunnertaralugu tusagassiorfinnut tapiissuteqartarnermi
malittarisassat nutarterneqarnissaat siunnersuutikkut siunertarineqarpoq. Siunnersuutip
ilaatigut kingunerivaa pappiaranngorlugit saqqummiussisarnissamik piumasaaqatip
atorunnaarsinneqarnera, aaqqissuisut ukiumut ikinnerpaamik pingasuunissaannik
piumasaaqatip aalajangiusimaneqarnera aammalu internetikkut tusagassiorfiit ullut tamaasa
nutarterneqartarnissaannik piumasaaqammik atuutilersitsinissaq.

Kiisalu tusagassiorfinnut tapiissutinik tunniussinissamik aalajangiinerit
kinaassusersiunngitsumik tunngaveqarnissaannik qulakkeerinissaq siunertaralugu
aalajangiinerit Naalakkersuisunit aalajangerneqaannartarnissaat siunnersuutikkut
siunertarineqarpoq.

Siunnersuutip Inatsisartunit siullermeerneqarnera

Aaqqissuisut ukiumut ikinnerpaamik pingasuunissaannik piumasaqaatip aalajangiuisimaneqarnissaa naapertuunnersoq imaluunniit aaqqissuisut ukiumut marluinnanngorlugit piumasaqaat annikillisinneqassanersoq siunnersuummik siullermeerinninnermi annertuumik oqaluuserineqarpoq.

Kiisalu tusagassiorfinnut tapiissutinik aalajangiinerit Naalackersuisunit aalajangiunneqartarnerat naapertuuttuunersoq oqaluuserineqarpoq. Aammalu internetikkut tusagassiorfiit ullut tamaasa nutarterneqartarnissaannik piumasaqaammik sooq atuutsitsisoqalertariaqarnersoq oqaluuserineqarpoq.

Siunnersuut aningaasanut inatsimmi aningaasaliissutit amerlineqarnerannik nassataqannginnera aamma eqqarsarnartoqartinneqarpoq.

Siunnersuutip aningaasaqarnikkut kingunerisassai

Siunnersuut pisortanut aningaasaqarnikkut allaffissornikkullu kinguneqassanngilaa.

Ataatsimiititaliap siunnersuummut oqaaseqaatai

Aaqqissuisutut ukiumut sulisorisat amerlassusissaannut piumasaqaat tusagassiorfinnut aallarterlaanut atuutinngitsoq ataatsimiititaliamit oqaatigineqassaaq, tassa taakku piumasaqaammut ilaanngimmata. Taamaalillunilu suliffeqarfik tusagassiorfinnut tapiissutinik qinnuteqartoq ukiumi qinnuteqarfiusumi imaluunniit ukiup siuliani suliffeqarfimminik aallartitsisimaguni, tusagassiorfiup pineqartup aaqqissuisutut ukiumut pingasunik sulisoqarnissamik piumasaqaat ukiut marlungajaat tikillugit malittariaqanngilaa.

Tusagassiorfinnut tapiissutinik tunniussinissaq Naalackersuisunit aalajangiivigineqartassamat ataatsimiititaliamit malugineqassaaq. Tunniussinissamik aalajangiinerit kinaassusersiunngitsumik tunngaveqarlutik pisassapput aammalu naliliinerit kinaassusersiornermik tunngavillit periarfissaassanatik.

Naalackersuisut ataatsimiititaliap allakkatigut apeqqutaanut akissuteqaamminni erseqqissaatigaat aalajangersakkap siunnersuummi maanna oqaasertaliorneqarnera ima isumaqartoq tusagassiuutit naqitikkat tapiiffigineqarsinnaatitaassagunik qaammammut ikinnerpaamik ataasiarlutik saqqummiunneqartassasut aammalu internetikkut tusagassiuutit tapiiffigineqarsinnaatitaassagunik ukioq kaajallallugu ullut tamaasa nutaamik immersorneqartariaqartut.

Ataatsimiititaliap inassuteqaatai

- Ataatsimiititaliami amerlanerussutillit, Demokraatineersut aamma Inuit Ataqtigiinneersut, siunnersuut akuerineqassasoq inassutigaat.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

Nivi Heilmann Efraimsen
Siulittaasoq

Isak Johannessen
Siulittaasup tullia

Margrethe Thårup Andersen

Karen-Marie Kyed
Frederiksen

Nivi Rosing